

自南行北、

〔續日本紀十四〕天平十三年五月乙卯、天皇幸河南觀校獵、

〔續日本紀三十七〕延曆二年十月戊午、行幸交野、放鷹遊獵、庚申、詔免當郡今年田租、國郡司及行宮

側近高年、并諸司陪從者、賜物各有差、又百濟王等、供奉行在所者一兩人、進階加爵、施百濟寺近江播

磨二國正稅各五千束、授正五位上百濟王利善、從四位下、從五位上百濟王武鏡、正五位下、從五位下

百濟王元德、百濟王玄鏡、並從五位上、從四位上百濟王明信、正四位下、正六位上百濟王真善、從五位

下、壬戌、車駕至自交野、

〔續日本紀三十七〕延曆六年十月丙申、天皇行幸交野、放鷹遊獵、以大納言從二位藤原朝臣繼繩別業

爲行宮矣、己亥、主人率百濟王等、奏種々之樂、授從五位上百濟王玄鏡、藤原朝臣乙叡、並正五位下、

正六位上百濟王元真、善真、忠信、並從五位下、正五位下藤原朝臣明子、正五位上、從五位下藤原朝臣

家野、從五位上、無位百濟王明本、從五位下、是日還宮、

〔類聚國史三十二〕延曆十二年二月癸丑、遊獵于栗前野、便御伊豫親王莊、親王及山背國司等奉獻、五

位以上賜衣被、八月甲戌、遊獵于葛野、御右大臣藤原朝臣繼繩別業、賜侍臣及大臣子弟衣、十一

月乙酉、遊獵於交野、右大臣從二位藤原朝臣繼繩獻摺衣、給五位已上及命婦采女等、十二月癸亥、

遊獵於岡屋野、左大辨從三位紀朝臣古佐美、右兵衛督從四位下紀朝臣木津魚奉獻、賜侍臣已上物

有差、

〔類聚國史三十二〕延曆十七年八月庚寅、遊獵於北野、便御伊豫親王山莊、飲酒高會、于時日暮、天皇歌

曰、氣佐野阿狹氣、奈久知布之賀農、曾乃己惠遠、岐嘉受波伊賀之、與波布氣奴止毛、登時鹿鳴、上欣然、

令群臣和之、冒夜乃歸、

〔類聚國史三十二〕延曆廿三年正月丙申、遊獵于水生野、是日天寒、於野中賜五位已上衣、